



Trais tiradurs e veterans ch'èn vegnids undrads per lur buns resultats il 2015: Roman Egger, Schluwein, Paul Prevost, Puntraschigna e Leopold Caviezel, Vrin (da san.).

Suenter 95 onns ina premiera

Uniun chantunala dals veterans da tir

DA GION NUTEGN STGIER / ANR

■ **Cun Marlis Turner appartegna per l'emprima giada ina dunna a la suprastanza da l'uniun ch'è vegnida fundada il 1921. Da nov en quel gremi è er vegni elegi Max Buchli. Cun sa reducir onn per onn il dumber dals tiradurs ha cunzunt l'Uniun svizra dals veterans da tir da cumbatter cunter il regress dals commembers.** Gia dapi onns èsi tradiziun che la radunanza annuala da l'Uniun chantunala dals veterans da tir dal Grischun ha lieu en la «Cantinetta Biella» da la EMS Chemia a Domat. Sa radunads èn sonda passada 200 veterans da tir da l'entir chantun. El saja satisfatg dal grond interess per la radunanza, ha ditg *Othmar Casutt*, dapi in onn president da l'uniun grischuna che reunescha ils veterans da tir. Grazia al grond sustegn da ses antecessur *Jakob Bardill* saja el sa vivi en bain en la suprastanza da l'uniun.

Festa federala da tir 2025 a Cuira?

Othmar Casutt ha fatg ina pitschna bilantscha da la Festa federala da tir 2015 en il Vallais, ina occurrenza che saja stada in vair success. L'occurrenza cun 35 000 participants saja cunzunt er da la vart turistica ed economica stada in gudogn, ha ditg Casutt. La proxmia haja lieu il 2020 a Lucerna e tschintg onns pli tard speranza a Cuira. «Nus savain segir er organisar ina festa federala e betg mo gieus olimpics», ha menziunà Casutt. La politica, l'economia, il turissem ed il sport da tir hajan da s'unir e s'engaschar communal per la realisaziun da quella occurrenza.

za naziunala il 2025 a Cuira. Il president dals veterans da tir da noss chantun è da buna speranza che er la regenza vegnia a sustegnair quel project che saja dentant anc en la fasa iniziala.

«Dad esser veteran n'è betg nausch»

Pleds simpatics als preschents ha er drizza *Beatrice Baselgia*, la presidenta communal da Domat. «Dad esser veteran n'è betg nausch», ha ditg la dunna, cunzunt sch'i saja er sco veteran pussaivel da sa deitgar al sport da tir. Ella spera che l'Uniun chantunala dals veterans da tir grischuna vegnia er en l'avegnir a salvar sia radunanza a Domat. *Christian Rathgeb*, il cusseglier guvernativ e schef dal departament da militar, ha ditg ch'ìls veterans hajan bain in privilegi cun avair in maun quiet per sajettar bain e precis. El ha cunzunt er engrazià als preschents per lur engaschi a favur dal servetsch da militar obligatoric. Rathgeb deplorescha che en Svizra sa diminueschia la voluntad da sa defender adina dapli, dentant in bun exempel per promover quella voluntad sajan anc adina ils tiradurs.

Main che 20000 commembers

Er vegni a pled tar la radunanza a Domat è *Bernhard Lampert*, il Grischun ch'è dapi il 2010 president dals veterans da tir da la Svizra. El ha cunzunt cusseglià als veterans d'animar er ils amis tiradurs da d'entir cantons da las uniuns dals veterans da tir. Il dumber dals veterans da l'uniun svizra saja da preschent sut 20 000 e sullet l'onn passà sajan 597 veterans sortids da las uniuns. Da l'Uniun chantunala

la dals veterans da tir dal Grischun èn il 2015 sortids 16 dels, 34 èn vegnids da nov commembers e 18 veterans èn morts. Da preschent ha l'uniun 818 commembers ed il pli vegl è cun 99 onns *Siegfried Peng* da Val. Quest onn dastgan schizunt nov veterans e commembers da l'uniun festivar lur anniversari da 90 onns.

28 veterans d'onur

En tavla èn er stadas elecziuns tar la 95avla radunanza da l'Uniun chantunala dals veterans da tir dal Grischun. *Marlis Turner* da Saas è vegnida elegida sco nova acturara ed uschia è ella l'emprima dunna che vegn a far part da la suprastanza da l'uniun. Ella ramplazza *Heinz Wurst* da Malans. 11 onns è *Jakob Turner* da Saas stà schef dal tir 300 m e per el han ils preschents elegi *Max Buchli* da Versomi. Demissionà sco cassier aveva *Oswald Grinenfelder* da Spleia, dentant cun na chat tar in successur resta el anc per in onn schef da las finanzas da l'uniun. Dapi sonda passada èn gist 28 tiradurs veterans d'onur cun gia avair gi 80 onns ubain avair quel anniversari radund en il decurs da quest onn. Tranter ils undrads sa chat tar er nov veterans da l'intschess rumantsch. Il 2021, a chaschun dal giubileum da 100 onns da l'Uniun chantunala dals veterans da tir dal Grischun, ha lieu a Cuira in tir da giubileum e na sco giavischà la Festa federala da tir da veterans. Quella avegn ad avair lieu a Berna ed il 2019 a Turitg. Ina midada datti tar il tir annual da veterans l'avust 2016 a Tusaun cun remplazzar ils premis natural entras cartas da cranz.



Marlis Turner e Max Buchli fan da nov part da la suprastanza da l'uniun da veterans.



Undrà dal president actual Othmar Casutt (san.) è vegni ses antecessur Jakob Bardill.



Tiradur e veteran cun corp ed olma: Georg Cabalzar da Castrisch.



Clers pleds da Bernhard Lampert, il president dals veterans da tir svizzers.



Militar e politica tar la radunanza a Domat: Colonel Jöri Kaufmann, Vitus Dermont, president dal cussegl grond e colonel Lorenzo Rampa (da san.).



Dus novs veterans d'onur: Martin Hitz, Danis e Flurin Casanova, Vignogn (da san.).